


L E  
R E M E R C I -

M E N T D E S C A T H O -  
liques vnis, faiët à la Declara-  
tion & Protestation de Hen-  
ry de Bourbon, dict  
Roy de Nauarre.



A P A R I S,

Par Rolin T H I E R R Y, ruë des Anglois,  
pres la place Maubert.

M. D. L X X X I X.

---

R E M E R C I

MENT DES CATHO

liques, sous le D

signe de l'Imprimerie de

de la Cour, de

Roy de France



A PARIS

chez le Citoyen TAYLOR, au Salon de la

Presidence de la Convention

AN V



L E

## MERCIMENT

DES CATHOLIQUES

*unis, faict à la Declaration & Pro-  
testation de Henry de Bourbon, dict  
Roy de Nauarre.*



**S**UR la Declaration, SIRE,  
que vous auez faicte le 4.  
iour de Mars dernier pas-  
sé, en qualité de Premier  
Prince, & premier Magi-  
strat de France: l'ay pris  
la hardiesse de vous faire ce remercimēt,  
sur la resolution que moy, le moindre de  
ce Royaume, ay peu entendre des Ca-  
tholiques unis, par vne sainte & sacree  
deuotion à la conseruation de la Religio  
Catholique, Apostolique & Romaine.  
Vous vous estes bien tard aduisé d'escri-

re aux Estats de France, qui sont rōpuz  
dès le 23. iour du mois de Decēbre pre-  
cedant, & apres les massacres y commis,  
emprisonnemens & autres forfaits con-  
tre leur autorité & contre la foy publi-  
que: Vous leur demandez qu'ils ayent à  
requerir la diuersité de religion, & tou-  
tesfois tous leurs cahiers ne tendoient  
qu'à ce qu'il n'y eust qu'une Foy, qu'une  
Loy, & qu'un Roy: & que vous comme  
chef des heretiques, fussiez déclaré en-  
nemy & incapable de ceste Couronne.  
Nous vous remercions doncques bien  
grandement, de ce que vous offrez & si  
protestez d'employer vostre industrie,  
vostre conscience, voz moyens, & voz  
forces pour remedier aux troubles de la  
France, & nous mettre en paix par un  
mélange & embarrasement de diuerses  
religions. Nous vous remercions, di-ie,  
c'est à dire, nous ne voulōs point de vo-  
stre remede, & vous prions de ne vous  
point mesler de noz affaires: Nous cer-  
chons bien la paix, & serions bien mal-  
aduisés, si nous fuyons ce seul & unique  
moyen, de nous contenir en l'honneur  
de Dieu, & en la conseruation de la so-



cieté humaine. Mais nous ne voulons pas nous ayder de voz moyens. Nous cerchons la paix avec Dieu, en l'honorant en nostre ancienne & asseuree religion, & nous conseruant noz villes, noz maisons, & famille, en vne seule opiniõ & conforme façon de viure, non entremeslee des disputes de voz Predicans, n'y bigaree de diuerfes solemnitez, que vous voulez introduire par vne liberté de conscience. Nous entendons qu'en vne mesme lague, par la vertu d'un mesme sacrifice, sous la sainteté de mesme Sacremens, & par l'intercession de mesmes prieres, nous puissions tous d'une voix inuoquer la grace de Dieu, & en vne seule Foy, & vne seule Loy, nous asseurer les vns des autres. Et pour ce no<sup>o</sup> auõs fort à suspect la paix que vous nous presentez : Car en diuersité de religion, il y a peu de respect aux promesses des vns enuers les autres : & cõme vous dictes, *où Dieu est diuersement seruy, il est par consequent mal seruy*, qui est vne chose vraye. Car gens de deux religions ne se tiennent pas obligez de Foy l'un à l'autre, n'y ayant entr'eux de promesse dura-

ble. Tesmoing le serment de vostre mariage, & des Ediëts de pacification, que vous n'avez obseruez, sinon entant que vous avez pensé, qu'ils vous donneroient moyen de respirer pour nous surprédre plus à vostre aise. Et ce nous eust esté vn grand bien, qu'en la ville de Blois, aux Estats generaux que l'on y tenoit, pour se despaistrer de voz pernicieuses paix, nous eussions esté bié aduertis que chacun n'auoit pas vne pareille reueréce au S. Sacremét de nostre religion que nous auôs: & que nous n'eussions pas ignoré, ce dont vous nous assurez à present par vostre Declaration, *que vostre innocence est imprimée dans l'ame & cōscience de celui que vous appelez vostre Roy, & vostre souverain.* Car nous ne nous fussions pas ainsi laissé surprédre, & nous est vn grâd malheur que de nous estre appuiez sur le serment d'un qui n'a vsé de noz Sacremens que pour se perjurer. Vous adioustez en vn autre endroiët ces mots, *Dieu à touché le cœur du Roy, il a pris la querelle pour moy.* Et neantmoins sous pretexte de vous faire la guerre, il a leué vn nombre infiny de deniers sur sō peuple, & enuoyé Mō-

sieur de Ioyeuse avec quatre ou cinq cēs  
 Gentils-hommes, contre vous à vostre  
 compte, comme à la boucherie. Et puis  
 qu'ainsi est que c'est pour l'amour de vo<sup>us</sup>  
 & pour vostre querelle, c'est à dire pour  
 la religion Huguenotte, deportez vous  
 fil vous plaist, & ne no<sup>us</sup> importunez plus  
 de voz offres. Ce n'est pas icy la premie-  
 re fois que vous vous estes presēté pour  
 Medecin de nostre maladie, & que vous  
 en avez esté, cōme à present, éconduit,  
 il faut laisser au malade de choisir son  
 Medecin, & n'admettre pas ceux qui au  
 peril de la vie du patient, se veullēt met-  
 tre en credit. Et mesme sont à craindre  
 vn tas d'Emperiques, qui ne se veulent  
 aider que de remedes nouueaux, & non  
 encor experimentez. Toutes nouveau-  
 tez nous sont fort suspectes, & trouuons  
 meilleur de suiure l'aduis commū & ap-  
 prouué de toute ancienneté. La pauvre  
 ville de Chastelleraud, ou vous avez cō-  
 posé vostre recipé, est en dāger d'en souf-  
 frir beaucoup, comme les autres villes  
 que vous tenez par force, & les ingre-  
 dians dont vous aidez sont de tres-fas-  
 cheuse & perilleuse purgation: Car il n'y



a reliques ne gallices ny autres ornemēs  
 del'Eglise qui n'en soient euacuez. Et de  
 faict par vostre Declaration, vous pro-  
 testez en ces mots, parlāt au Clergé: *Au*  
*lieu ou i'ay puissance, ie leur tiendray quasi*  
*tout*: qui est pour monstrier le bien qu'il  
 peut esperer de voz remedes. Et certai-  
 nement vous auez grace, quand dès le  
 commencement de ceste Declaration,  
 vous confessez que vous estes *l'argumēt*  
*des tragedies de France*, c'est à dire le subiet,  
 le principe, & le motif de tous les mal-  
 heurs que nous auons en ce miserable  
 Royaume: & combien que *vous puissiez*  
*pardonner à vous mesme, ce neantmoins vous*  
*dictes, que vous en estes l'occasion*. Qui sont  
 les propres mots de vostre Declaration  
 laquelle nous faict ébahir, que vous van-  
 tez de pouuoir apporter le remede con-  
 uenable à nostre douleur: de façon que  
 vous tēdez de guerir le mal de nostre vl-  
 cere, par la cause mesme de la blessure.  
 Qui est vn mauuais methode & qui est  
 fort reietté entre les plus experts Medec-  
 ins, si ce n'est par le moyen que vous  
 cottes en disant, *que vous voudriez auoir*  
*estaint le feu de nostre sieure, & n'estre plus*.  
 Nous



Nous vous prendriôs volōtiers au mot,  
 & croyons que ce seroit vn grand prepa-  
 ratif de nostre guarison: mais vous nous  
 en ostez bien tost l'esperance, quād vous  
*protestez de maintenir toutes sortes de religiō,*  
*& y employer toutes voz forces au peril de*  
*dix mil vies.* Car celà ne s'accorde pas, à  
 ce que vous confessez, *qu'ou Dieu est di-*  
*uersement seruy, il est par consequent mal ser-*  
*uy.* Il est vnique & ayme l'vnité de ses  
 creatures: Ioint aussi qu'autrefois en la  
 ville de Montauban, incontinent après  
 la mort de Mōseigneur le Duc d'Anjou,  
 conferant avec le sieur Roquelaure, &  
 vostre ministre Marmet, de ce que vous  
 auiez à faire, vous pristres resolution, par  
 l'aduis & cōclusion du feu President du  
 Ferrier vostre Chancelier, que iamais  
 vous ne changeriez de religion, & main-  
 tiendriez iusques au dernier soupir de  
 vostre vie, la doctrine en laquelle vous a-  
 uiez esté institué & nourry, par les mini-  
 stres de la secte de Caluin. Et sur ceste  
 deliberation, vous feites vne assemblee  
 de tous voz confederez, ou se trouuerēt  
 deputez d'Angleterre, de d'Annemark,  
 de Geneue, de Sedan, Et sur tout ce qui

fut remarqué, le sieur d'Espernō s'y trouua, & promistes de ne iamais dissimuler vostre religion. Et ainsi nous sçauons bien que vous perseuererez, ne voulant pas estre accusé de legereté, enuers tant de Princes & Seigneurs. Car c'est vn vice dōt vous ne voulez pas estre mescreu. Et de faict quelque protestation q̄ vous faciez maintenāt, de maintenir les deux religions, si est-il certain, que vous auez promis à voz ministres de les conseruer, qui est à dire ruiner les Catholiques. Car les Huguenots faident de deux moyens comme nous faisons, à sçauoir de Predications & de la force. Et puis que les Predicans Huguenots nous reprochent estre heretiques, & qu'ils ont presché, & faict des liures, pour mōstrer que les heretiques doiuent estre bruslez, il s'ensuit que par la force vous entendrez maintenir ceste proposition, & par voz armes effectuer ce que voz Predicans veullent persuader par leurs raisons. Et que la liberté de cōscience que vous promettez à present, n'est qu'en attendāt que vous puissiez establir l'autorité que vo<sup>r</sup> pretendez auoir en ce Royaume. Vous in-

gerant desia d'y vser de commandemēs  
 & de menaces à ceux qui ne voudront  
 vous obeïr. Et de faict, vous protestez  
 que ce n'est sinon pour ceste heure, que  
 vous entendrez maintenir diuersité de  
 religiō: c'est à dire iusques à ce que vous  
 soyez le plus fort, voulāt gagner le Cler  
 gé par ces paroles: *Quant à leur profession  
 & leur religion, en quelque chose ie leur suis  
 cōtraire, en nulle leur ennemy: en d'autres nous  
 sommes d'accord, ne fusse qu'en ce qui touche  
 la cōseruation des priuileges de l'Eglise de Frā  
 ce & libertez: c'est à dire quād il est que  
 stiō de dénier l'autorité de nostre saint  
 pere le Pape, & renuerfer toutes les con  
 stitutions de l'Eglise vniuerselle. Car les  
 polytiques de nostre temps l'interpretēt  
 ainsi, & l'estendent aussi auant qu'il plaist  
 aux Huguenots, puis apres vous adiou  
 stez: Quoy que soit si i'auois avec eux toutes  
 les prises du monde, ie les mettrois sous le pied  
 pour ceste heure, emporté par vne plus forte  
 consideration, qui est le seruice de mō Roy, &  
 du bien de cest estat: qui est pour monst  
 rer qu'en attendant vostre meilleure com  
 modité, vous preferez l'esperance que  
 vous auez au Royaume, à ce que vous*



estimez estre agreable à Dieu. Et voylà comme nous ne sommes pas ignorants quel est l'intellect de vostre protestation, disant : *Je proteste que tout ainsi que ie n'ay peu souffrir que l'on m'ait contraint en ma conscience, aussi ne souffriray-je, ny ne permettray iamaïs, que les Catholiques soient contraincts en la leur, ny en leur exercice libre de religion:* ce sont paroles pour vous insinuer en quelque bonne opinion. Et en lisant cellà il nous est souuenu des priuileges & dispêces octroyez par voz ministres aux Huguenots leur permettant de passer au trauers noz Eglises, pour y prendre leur plus court chemin, ou bien de s'y tenir à la suite de quelqu'un à qui ils eussent à faire. Car c'est ainsi que vous pretendez vous faciliter & abreger le chemin du Royaume de France, & pour vostre commodité. Comme petit à petit l'on fit en Angleterre, & vous l'avez obtenu en Biart, où il n'y a pour ceste heure Catholique, qui ose paroistre, & ne sont pas en feureté, mesme dans les plus tenebreuses caues de leurs maisons : & par tout où vous commandez absolument, vous tenez le peuple en telle frayeur, que vous



leur faictes demãder & cōsentir ce qu'il vous plaist. De sorte que pour n'encourir les peines de voz menaces, il est facile de faire demander aux Estats, ce que bõ vous semble. Et c'est ainsi que vous voulez que lon tienne vn Concile national libre, c'est à dire, ou vous soyez le plus fort, & en la congregation duquel, vous parueniez à mesme effect, qu'en l'assemblée des Estats tenuz à Blois, que vous approuuez : *Et protestez de faire recognoistre l'autorité du Roy*, quand par la mansuetude de son naturel, en fauçât la foy, il a proditoirement faict assassiner les Princes Catholiques, emprisonner les autres, rompre les Estats, & effaroucher de telle façon tous les deputez des provinces de ce Royaume, que le plus hardy d'entr'eux n'a plus garde de demander l'assemblée des Estats, sous son autorité, n'y sous la vostre. Et sil n'y est autrement pourueu par les moyens que Dieu nous fera la grace d'auoir, no' laisserions desormais plustost tout deperir, que de demãder reformation, qui nous mette à telle difformation. Ce sont les effects de voz ministres beau Sire, quãd

par leur nouvelle doctrine, ils ont persuadé, que les Sacremens de nostre Eglise ne sont pas obligatoires : vous avez raison de reconnoistre les Princes de Lorraine, pour voz proches parens, gens de valeur & de services. Car quand vous feistes contenance par l'espace de trois ou quatre ans d'estre Catholique, ils vous ont aimé, chery, & honoré, autant que jamais vous eussiez sceu souhaiter, & ne vous ont laissé que lors que vous avez abandonné l'Eglise de Dieu. Et si le Roy eust voulu se servir d'eux, il eust esté le plus grand & le plus heureux Prince de la Chrestienté. Mais le malheur en a dict autrement à la Frâce, par le ministere de ceste Huguenotte heresie, ou plustost de l'atheisme, en introduction & meslange que l'on veut faire de diuerses religions. Si vous estiez en ceste qualité receu nostre Roy, lon pourroit faire cõparaison de celuy qui espousant vne iuste & loyale femme, reserve toutesfois de coucher avec sa concubine. Et neantmoins vous nous dictes *que nous prenions le chemin de vous instruire, & que nous y profiterõs beaucoup*. A vous ouïr parler, vous n'estes

plus heretique, mais parauenture auez  
 passez outre. Car il n'y a heretiques, que  
 ceux qui ont quelque religion obstinee,  
 & si desia vo<sup>r</sup> nous promettez que nous  
 profiterons à vous instruire, vous auez  
 donc esperâce de paroistre Catholique,  
 & parauanture nous ne le prometterez  
 vous ainsi, sur vne foy semblable, que  
 celle qui nous fut iurée à Blois pour vo-  
 stre querelle. Et sur laquelle il y a toutes-  
 fois occasiō de craindre, que nous n'eus-  
 sions aussi mauuaise yssuē de vostre pre-  
 tenduē innocence, que nous auōs eu de  
 la bonté & clemence de celuy que vous  
 appelez vostre Roy, & souuerain. Il est  
 bien vray que vous pensez auoir trouué  
 ouuerture d'accord entre nous, *en nous*  
*rangeant à ce que decernera un Concile libre,*  
 c'est à dire, ou vous soyez en seureté, &  
 non pas nous, tout de mesme que pour  
 voz pretentions contre Monseigneur le  
 Cardinal vostre oncle. Car pendāt qu'à  
 la hôte de ses nepueux, il est prisonnier,  
 vous estimerez estre en liberté de con-  
 ferance avec luy, pour vider la quēstiō  
 sur laquelle sont esmeuz les troubles de  
 France. Et cōbien que vous disiez qu'ils



font fondez sur la vaine & imaginaire  
 crainte de vostre succession à cest estat, Si est-  
 ce que vous nous donnez bien à enten-  
 dre qu'elles font voz pretentions, quand  
 desia par ceste Declaration vous nous  
 commâdez de poser les armes, avec me-  
 naces de nous punir, si nous y contreue-  
 nons. Et les lettres de proximité q̄ vous  
 auez obtenuës, & autres voz actes, font  
 bien paroistre qu'elle est vostre intentiõ,  
 pendant l'euenement de laquelle, vous  
 demandez vn Concile. Mais qu'elle ap-  
 arence y auroit-il de demander vn Cõ-  
 cile nouveau, veu que les precedans, &  
 principalement celuy de Trente, qui est  
 exprez, ont desia condanné vostre he-  
 resie. Et est certain que sur vne mesme  
 heresie, lon ne tient iamais deux Conci-  
 les, & suffit qu'elle ait esté vne fois con-  
 damnee. Ioint aussi que ce n'est à nous  
 qu'il se faut adresser, pour demander vn  
 Concile general. Que si vous entendez  
 vn Concile national, ja Dieu ne plaife  
 que pour vne dispute qui appartient à  
 toute l'Eglise, lon nous accuse d'en vou-  
 loir seuls determiner en nostre país. Les  
 Conciles nationaux, ne sont que pour  
 ce qui



ce qui est propre & particulier à la natiō:  
 mais nostre religiō est commune à tou-  
 te l'Eglise vniuerselle, hors de laquelle  
 nous ne deuons, ny ne pouuons rien de-  
 liberer. Car ce seroit nous mettre au ha-  
 zard de nous separer del'Eglise Catho-  
 lique, Apostolique & Romaine, hors de  
 laquelle nous croyons fermement, qu'il  
 n'y a point de salut, & sçauons bien que  
 toutes les oppositions que lon a formé  
 cōtre la publication du Concile de Tré-  
 te, ne sont qu'en vostre faueur. Car hors  
 mis la cōdamnation paticuliere qui est  
 de l'heresie de Calvin, il n'y a rien qu'une  
 repetition de l'ancienne ordonnance &  
 discipline de l'Eglise: & ceux qui disent  
 que le Pape y est mis par dessus le Cōci-  
 le, & qu'il y a des constitutions cōtraires  
 à l'ancienne liberté de la France, s'abu-  
 sent, & s'ils auoient pris la peine de le li-  
 re, ils congnoistroient le contraire. Je  
 dis exprez de l'anciēne liberté de la Frā-  
 ce, & non pas des nouuelles licences, &  
 debordemens que les heretiques y ont  
 scandaleusēmet introduit: de sorte que  
 vostre demāde n'est iuste ne raisonnable,  
 quād vous tendez à vn Cōcile national,  
 contraire aux Conciles generaux. Ce

que nous croyons, nous ne le voulons plus reuoyer en doute : comme aussi par tant de colloques, & disputes, nous auõs apperceu que les authoritez & raisons n'ont de rien seruy, & n'est pas possible d'apporter aucune chose de nouveau, qui n'ait desia esté ditté, & escrite, & ne nous estât point venu de nouveaux textes d'Euangile, il ne sortiroit rien de noz docteurs, que vous n'ayez assez ouy, & si ne voulons point de voz raisõs, qui n'ont esté que par trop entenduës. C'est à faire à gës qui doutét de leur croyãce, de demander estre instruits, cõme aussi seroit-il difficile, de definir vn Concile libre, & du tout impossible de l'executer encor. Je vous demanderois volontiers, qui c'est que vous entendez faire Iuges de nos differens. Ce seroient parauãture des Polytiques, que n'ayans point de party, nous accorderoiët facilement, en mettât au neant l'vne & l'autre religion. C'est ce disent-ils, entendre les affaires d'Estat, que de se lacher la bride de ceste façõ, & vaguer à volõté en ses discours, sans s'abstraire aux regles del'Eglise, mais faire comme chacun l'entend, par vn droiët de biẽ-seance. Nous en sentõs

les effects, par les ingenieuses subtilitez des Partisans, & libertins, qui sans loy, & sans religion, ont accommodé le public. à leur particulier. Ce sont d'estranges reformateurs, que ces Messieurs là. Et eust grace vn iour le Lieutenant de S. Maixen par vn apophtegme q̄ merite d'estre mis en memoire. Car ayant esté decernees commissions aux Conseillers d'Estat, pour aller par tout le Royaume, sçauoir les plaintes du peuple, c'est à dire decourir quel il y faisoit, & trouuer moyen de nouveaux subsides. Comme vn certain Prelat eust deux & trois fois sommé le corps de ville, de luy declarer ce qu'ils auoient à dire, pour en dresser son procez verbal, il ne peust rien tirer de l'assemblée, ny bon ny mauvais, & la raison luy en fut expliquee par ce Lieutenant, qui dist que les habitâs se gardoient de mesprêdre, & qu'ils craignoiêt qu'en recitâs leurs douleurs, ils fussêt surpris du costé où ils auroient oublié de se plaindre, ay-mans mieux ne riê dire, qu'en comptant leur miseres, d'ôner ouuerture de les augmenter, par mauuaises drogues. Ainsi l'assemblée des Estats nous a esté perniciouse, ne nous ayant apporté chan-



gement, que de mal en pis : aussi vostre nouveau Concile nous attraperoit, à quelque sinistre euencement, & vaut mieux suivre noz premieres brisees, & nous efforcer avec la grace de Dieu, de nous deffaire de ceux qui causent tous noz maux : voire mais vous dittes qu'aussi bien n'y gagnerons nous rien, & que l'heresie se doit combattre *par disputes, & non par armes*. Enquoy il me souuient d'un ieune Aduocat, lequel voulant s'aduācer au barreau de la plaidoirie, soustenoit qu'il ne falloit pas punir les coupebourses, & qu'aussi bien quelques punitions que lon en ait faiēt, le nombre n'é amoindrissioit pas, & qu'il fal'o'it plustost les admōnester. Ce qui auoit plus d'apparence que vostre propositiō : car les coupebourses se trouuēt volōtiers aux meilleures predications, où il y a plus de presse, & non pas les huguenots qui ne veullent entendre ce que lon leur dict. Et sur ce que vous dictes, *que lon vous a sommé de changer de religion la dague en la main*, vo<sup>9</sup> faiētes tort en la reputatiō de Mōsieur le Cardinal de Lenoncourt, lequel vous a esté trouuer plusieurs fois, avec plus de submissions, & nouuelles



sortes de persuasion, que beaucoup de gens de bié n'eussent desiré. Et les bônes gens de docteurs de Sorbonne, que lon vous enuoya pour vous prescher à l'ancienne mode, n'auoient point d'armes, & toutefois vous n'en teintes compte. Aussi estiez vous bié aduertie de la bône volonté que vous confessez à present, que le Roy vous porte. Ce qu'il ne peust dissimuler en vne petite forme d'Estats, qu'il tint à S. Germain en Laye, sur la fin de l'annee mil cinq cés quatre vingts & quatre. Car Môseigneur le Cardinal de Bourbon luy ayant proposé que les plus importantes affaires du Royaume, estoient d'exterminer les heretiques, & n'auoir qu'une religion, il s'esmeut de telle façõ qu'il en perdit contenance, & se courrouça si aigrement, qu'à peine le pouuoit-on apaiser, & par là fut facile de cognoistre que la diuersité de religiõ luy plaisoit. Et voilà la paix en laquelle vous voulez nous entretenir, pour quelque temps, cõme vous dites, à fin de mieux paruenir à voz desseins : & bref nous voyons bien que par la mort & empri-  
sonnement des chefs des Catholiques, vous pësez auoir ville gaignee, & voulez

dire en sōme, que vous ne ferez pas des nostres, & que si nous voulons auoir la paix avec vous, il faut que nous soyons tous huguenots. Mais croyez, Sire, que nous n'en ferons rien, & que nous n'auons pas noz biens, noz maisons, noz vies, celles de noz femmes, & de noz enfans, si chers, que nous ne les vouliōs proposer à la grace de Dieu, & à nostre salut, que nous croyons fermement n'estre hors l'Eglise Catholique Apostolique & Romaine. Nous auons appris par les Histoires, que le Royaume de Frâce, à Sainctement assis la premiere pierre de son fondement, sur l'apuy de ceste religion, que par le moyen d'icelle, il s'est acquis de grandes victoires, s'est conserué contre ses ennemis, & a gagné l'honneur & la reputation par dessus toutes nations. Nous auons sceu que ceste religion, est l'assurance du peuple enuers les Roys : nous ne la voulons pas perdre. Et quiconque ne voudra tenir la loy du Royaume, ne sera point nostre Roy. Car comme le peuple ne faict pas luy seul le Royaume, aussi le Roy n'est riē sans le peuple, & par vne reciproque & mutuelle concordance, le Royaume

se maintient. Et quicôque le premier ne veut tenir ce qui est de son deuoir, & enfreint la loy du Royaume, faulse sa foy, & rend l'autre party quitte de la sienne. C'est la differéce que tousiours on a faict d'un Roy à un Tyran, que l'un commande par les loix, & l'autre selon son plaisir, & licentieuse souueraineté. Nous ne sommes point subjects à la Tyrannie. Mais nous voulons obeïr à un Roy selô l'ordonnance du Royaume: nous desirons estre vnis en l'obeïssance de noz loix, & que par l'obseruâce d'une mesme religion, nous soyons par les Sacremens d'icelle asseurez de la foy des uns enuers les autres. Nous ne voulons tenir pour compatriotes, ceux qui nous appellét idolatres. No<sup>r</sup> ne voulôs point que vous auctorisiez les mariages que l'Eglise à déclaré incestueux, & que vous faciez que ceux là soient noz heritiers, que nous ne voulons pas aduoïer à parrés. Nous ne voulôs partager avec ceux, qui se sont vouez dâs les monasteres, & lesquels nous ne recognoïssôs pour noz coheritiers: & ne dites pas que cela soit pour faire un estat populaire, n'y pour emouuoïr les villes contre la noblesse.



Car les Gētils-hōmes y ont autāt, voire plus d'intereſt, que le reſte du peuple. Quād no<sup>r</sup> no<sup>r</sup> mettōs en leur proteſtiō, quād nous frayōs aux armes, deſquelles nous leur laiſōs la cōduirte, quād nous leur deferōs les hōneurs & prerogatiues qui leur ſont deuës, quand nous les exhortōs de vailleureuſemēt combattre, & leur commettons les gouuernemens de noz villes, ce n'eſt pas pour eſleuer le peuple contr'eux. Et vous qui voulez faire tout le contraire, ne trouuez pas eſtrāge, ſi vous n'eſtes pas creu, deportez vous, ſil vous plaiſt, de nous preſenter voſtre paix, qui depuis 25. ans & d'auātage no<sup>r</sup> a continuellement diuiſez & entretenu en querelles & guerres : Auſſi bien eſperōs nous que Dieu nous fera la grace de nous maintenir contre voz menaces, & voz forces, & contre voſtre proteſtatiō, nous proteſtons au cōtraire, d'employer noz moyens, & noz vies, pour nous garantir & conſeruer. J'ay dit.

F I N.